

Nd.

89. Frumvarp til laga

[56. mál]

um breyting á sjúkrahúsalögum, nr. 93 31. des. 1953.

Flm.: Gunnar Jóhannsson, Karl Guðjónsson.

1. gr.

Fyrri málsg. 11. gr. laganna orðist svo:

Úr ríkissjóði greiðist árlegur rekstrarstyrkur til viðurkenndra almennra sjúkrahúsa sýslu-, bæjar- og sveitarfélaga, og miðast hæð styrksins við legudagafjölda sjúklinga á sjúkrahúsini á ári hverju og nemur 15 kr. á hvern legudag. Þó skulu þau sjúkrahús, er hærri styrks njóta, er lög þessi taka gildi, halda honum óskertum.

2. gr.

Lög þessi öðlast þegar gildi.

Greinargerð.

I gildandi sjúkrahúsalögum er ríkisstyrkur til sjúkrahúsa ákveðinn í þrennu lagi eftir því, um hve stór sjúkrahús er að ræða, þannig að stærstu sjúkrahúsin, þau sem hafa 100 sjúkrarúm eða fleiri, fá hæstan dagstyrk eða 20 kr. á hvern legudag sjúklinga sinna, sjúkrahús með 20–100 sjúkrarúmum fær 10 kr. dagstyrk, en minnstu sjúkrahúsin, þau sem hafa innan við 20 rúm, fá aðeins 5 kr. dagstyrk.

Svo er talið, að nokkur skilyrði séu sett um fullkomna þjónustu á hinum styrkhærri sjúkrahúsum, en hitt stendur þó óhaganlegt, að hversu fullkomna þjónustu sem hin smærri sjúkrahús veita, eru þau ekki talin styrkhæf nema að fjórðungi eða helmingi á við stærstu húsin.

Þessi ákvæði eru í fullkomnu ósamræmi við þá alkunnu reglu, að rekstur fyrirtækja er yfirleitt fjárhagslega erfiðari, eftir því sem umsetning þeirra er minni, og verður ekki séð, að sjúkrahúsarekstur sé nein undantekning frá þeirri reglu.

Þetta frumvarp er flutt til að freista þess að fá fram leiðréttingu á því ósamræmi, sem í nágildandi styrkákvæðum til sjúkrahúsanna felst.

Ef allur sjúkrahúsastyrkurninn yrði jafnaður, þannig að hann yrði 15 kr. á legudag til allra sjúkrahúsa, sem hann samkv. sjúkrahúsalögum nær til, mundi ekki verða um neina teljandi útgjaldabreytingu að ræða hjá ríkissjóði frá því, sem nú er. En flm. líta svo á, að hafi einhver réttlæting verið til að ákveða stærstu sjúkrahúsunum jafnháan styrk og gert var við setningu laganna, þá sé vart sanngjarnit að lækka hann nú, þar eð sjúkrahúsarekstur mun ekki vera hagkvæmari nú en þá var, og því er hér lagt til, að styrkur sjúkrahúsanna, sem hafa yfir 100 sjúkrarúm, haldist óbreyttur, en styrkur allra smærri sjúkrahúsanna hækki úr 5 eða 10 kr. á legudag í 15 kr. og verði þannig stefnt að jöfnuði milli stórra og smárra sjúkrahúsa.